

ՀՀ Գեղարքունիքի մարզպետ Ռաֆիկ Գրիգորյանի ելույթը շախմատի միջազգային մրցաշարի բացման առթիվ

Մեծարգո պարոն Նախագահ, հարգարժան հյուրեր, շախմատասերներ եւ շախմատի միջազգային մրցաշարի մասնակիցներ

Հերթական անգամ Մարտունի քաղաքը հյուրընկալել է «Սեւանա լիճ» խորհրդանշական անունը կրող շախմատի միջազգային 16–րդ կարգի մրցաշարի հայ եւ արտասահմանցի վարպետներին: Ավանդական դարձած ամենամյա այս մրցաշարի ընթացքում, որն արդեն տարիների պատմություն ունի, միջազգային վարպետների կողմից խաղարկվել են տպավորիչ պարտիաներ, բացահայտվել հնագույն խաղի նորանոր գաղտնիքներ, ի հայտ եկել ստեղծագործական մտահղացումներ:

Տարեցտարի մասնակիցների կազմում ավելանում են նորանոր անուններ, որոնց համար հեղինակավոր այս մրցաշարը դառնում է առանձնահատուկ փորձաշրջան եւ դարբնոց, հաղթական փառքի եւ ճանաչման հասնելու լավ հնարավորություն: Խոսքս կարող է հաստատել հնդիկ գրոսմայստեր Վիդիտ Սանթոշը, ով դարձավ նախորդ մրցաշրջանի հաղթողը ու այժմ էլ Մարտունի է ժամանել հաղթողի կոչումը պահպանելու հավակնությամբ:

Այն, որ այս տարի մասնակից երկրների թվում թվում են նոր անուններ՝ Ամերիկայի Միացյալ Նահանգները, Արաբական Միացյալ Էմիրությունները եւ Իսպանիան, արդեն խոսում են մրցաշարի հեղինակության աստիճանական բարձրացման մասին:

Անշուշտ, մրցաշարն առանձնահատուկ կլինի նաեւ մեր հայրենակից, Ամերիկայի Միացյալ Նահանգները ներկայացնող Սամուել Սեւյանի համար, ով արդեն հասցրել է հռչակվել շախմատային աշխարհում եւ այժմ հանդես է գալու մայր հայրենիքում՝ ունենալով բազմահազար հայրենակիցների աջակցությունը:

Կարծում եմ, որ «Սեւանա լիճ-2015» շախմատային մրցաշարը Մարտունիում հավաքել է միջազգային վարպետների բավականին հանրաճանաչ եւ ուժեղ կազմ ու խոստանում է չափազանց լարված, անզիջում պայքար, ստեղծագործական նոր փայլատակումներ, հաղթանակի բերկրանքներ: Բայց, իմ խորին համոզմամբ, վերջում հաղթելու է բարեկամությունը, մեր հյուրերն այստեղից հեռանալու են ոչ միայն հաղթանակի, այլ նաեւ ջերմ հյուրընկալության ու լավագույն այլ հիշողություններով:

Թույլ տվեք սրտանց շնորհավորել բոլորիս այս սպասված մրցաշարի բացման եւ տոնական օրվա՝ Վարդավառի կապակցությամբ, մաղթել խաղաղություն, առողջություն ու նորանոր հաջողություններ, հաճելի ու բարձր տրամադրություն, պայքարի գեղեցիկ ակնթարթներ:

Շնորհակալություն